



*Selasa, 17 Januari 2023*

**Ogen: Kejadian 2:22-23**



**Tulan Rangrang**



Diberu si pemena i bas doni enda icatat i bas Pustaka Si Badia, e me Hawa. Ia me ndehara Adam. Erti hawa e me kegeluhen ntah pe ulu kegeluhen. Bas Pustaka Si Badia ituriken maka Hawa itepa arah tulan rangrang Adam, sangana Adam tunduh. Alu kata sideban Hawa e me bagin kula Adam. Adam ras Hawa sada persadan. I bas Pustaka labo iterangkan engkai makana arus ibuat i bas tulan rang-rang nari, sabap melala nge bagin-bagin kula Adam si banci jadi bahan guna nepa Hawa. Tek kita maka Tuhan nggo milih si mehulina ras si payo akapNa.

I bas tradisi Jahudi, Rabbi Joshua nuriken maka i bas nepa Hawa, Tuhan nimbang-nimbang bagin kula Adam siapai nge si ipakeNa guna nepasa. Labo itepaNa Hawa arah takal Adam, sabap banci jadi megangjang kari akapna bana. La itepa arah mata, gelah ula pagi kai pe atena ietehna, labo ka itepa arah cuping maka ula kai pe atena ibegikenna, la arah babah maka ula ngeranai saja dahinna, Hawa la itepa arah ate gelah ula pagi ia perpusuh ras nukah ercian ate man kerina jelma, ia la itepa arah tan gelah ula lit sura-surana muati kerina si lit i bas doni enda, labo ka ia itepa arah nahe sabap banci jadi lawes atena lalap. Erkiteken si e me maka ipilih Tuhan tulan rang-rang, bagin si la teridah amin gia Adam manjang-anjang. La pe teridah tapi tergejap kerehenna, mereken proteksi ntah pe perlindungan man si la megegeh i bas diri perbulangenna. Tulan rangrang isebelah nari, ndeher ras tan guna jadi pendamping, ndeher ras ate guna ikelengi. E maka selaku tulan rangrang sekalak diberu e me pendamping si tuhu-tuhu penting man sekalak dilaki. Subuk dilaki ras diberu labo banci erbana-bana. Sabap diberu rehna i bas dilaki nari, ngergaken perbulangen seri ertina ras ngergaken dirinta jine. Dilaki ras diberu setara, teman si seri ganjangna iadepen Dibata.

